

TUSI TAIALA

**MO LE PULEA TATAU MA LE VA'AIA LELEI O
I'A MA FIGOTA O LE GATAIFALE**

O LE AFIOAGA O



SAUNIA:

Pule mamalu a Alii ma Faipule ma tagatanuu o le Afioga o SALEILUA ma le Lagolagosua a le Vaega o Faigafaiva.

Matagaluega o Faatoaga ma Faigafaiva

FAASOLOGA

| | | |
|-----|--|----|
| 1 | UPU TOMUA..... | 1 |
| 1.1 | Autu o le Taiala..... | 1 |
| 2 | TULAFONO AUTU O FAIGAFAlVA | 2 |
| 2.1 | Tulafono Faatonutonu o Faigafaiva (mo le Laiti o l'a ma Figota)..... | 2 |
| 2.2 | Tulafono Laiti a Afioaga | 2 |
| 3 | FAAMATALAGA E UIGA I LE AFIOAGA | 2 |
| 3.1 | Gataifale o SALEILUA | 3 |
| 4 | FAIGAFAlVA I LE AFIOAGA ma FAAFITAULI | 4 |
| 4.1 | Ituaiga Faigafaiva ma l'a Maua..... | 4 |
| 4.2 | Aotelega o Tulafono Faale-nuu tau Faigafaiva i Aso ua Mavae..... | 4 |
| 5 | O LENEI FUAFUAGA TATAU/TAIALA..... | 5 |
| 5.1 | Tapenaga | 5 |
| 6 | TOE ILOILOINA O LENEI TUSI TAlALA | 6 |
| 7 | FUAFUAGA FAATAATITIA ma TULAFONO..... | 6 |
| 7.1 | Ia Faamalosia Tulafono Faale-nuu e Faasaina ai Faigafaiva le Talafeagai..... | 7 |
| 7.2 | Ia Faasalalauina Tulafono a le Afioaga..... | 7 |
| 7.3 | Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami..... | 8 |
| 7.4 | Ia Aoina ma Faatama'ia Alamea..... | 9 |
| 7.5 | Ia Faasaina tu'iga ma faamo'a..... | 10 |
| 7.6 | Ia Faasaina le Fagotaina o l'a ma Figota Laiti | 10 |
| 7.7 | Faasaina faigafaiva mai isi Afioaga | 11 |
| 7.8 | Ia faasaoina ma faateleina amu..... | 11 |
| 8 | ILOILOGA O LE TAlALA..... | 12 |
| 9 | UPU MULIMULI | 12 |
| 10 | SUI AUAI I LE FONOTAGA SA TOE ILOILOINA AI LENEI FUAFUAGA TATAU | 13 |
| 11 | KOMITI O LE FAASAO A LE AFIOAGA..... | 13 |

Fa'alupega o le Afioaga

**AFIO LE TAMAITAI MA LE
TOAFA O TAMATANE
LE MATUA IA FANENE
SUSU LUFILUFI MA TAULAUNI**

1 UPU TOMUA

O faigafaiva i gataifale o Samoa e taua tele mo le fofoga taumafa aemaise lava i afioaga i tua. I le tele o afioaga, latou te le o faatauina le pulea tatau ma le vaaia lelei o punaoa ma le siosiomaga o le gataifale. O le faia ma le faaogaina o ituaiga faigafaiva faa-onapo-nei e i ai mea manava, upega ma tili mataninii e faamata faigofie ai ma tele ai i'a maua ae o loo faaitiitia ai le tamaoaiga o le gataifale. O nisi o atinae ma galuega faatino ua faaleagaina ma faatamaia ai le tele o nofoaga ma meaola o le sami e pei o:-

- le tanumia o vaega o le gataifale mo eleele-fou (fanua);
- faigafaiva le talafeagai pei o fanaia, ava niukini, vailaau oona ma faamo'a/tuiga.

O nei faafitauli o loo tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faanatura e pei o galu malolosi faapea matagi ma afā ua tuanai e pei o Ofa 1990, Val 1991 ma Heta 2004.

O i'a ma figota o le sami sa faamoemoe iai le fofoga taumafa o tagata Samoa, ae ona o faafitauli pei ona taua ua faatamaia ma faaitiitia ai nei punaoa o le sami ua tele ai ina taugata ai, faapea le faamoemoe o tagata Samoa i meaai tuu aisa ma meaai tuuapa o lo o faatauina mai atunuu i fafo. O se atugaluga lea o lo o iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame o le faasaoina ma pulea tatauina o le gataifale o Samoa na amata mai e le Ofisa o Faigafaiva i le tausaga 1995 i le faatupega mai le Malo Ausetalia (AusAid) mo le lima tausaga. E faataua ai le fesootaiga ma le galulue soosoo tauau ma afioaga aua le faatuina o latou ogasami faasao. O tualumaga o le polokalame e aofia ai le soalaupuleina ma le fausiaina o se Tusi Taiala e tamauina ai fuafuaga faataatitia a le afioaga faapea le Ofisa o Faigafaiva.

O se tasi o autu taua o lenei polokalame o le toe tapu'e mai lea o tamaoaiga ma faaoga tatau punaoa o le gataifale ma le sami ina ia maua pea aua tupulaga lalovaoa o Samoa. O le puleaina ma le lelei o lenei polokalame faasao i nuu, e i lima ma aao o afioaga lava o lo o faaogaina nei punaoa ma tamaoaiga.

O fuafuaga faataatitia i lenei Tusi Taiala e unaia ai le vaaia lelei aemaise le pulea ma le fuafua tatau o le faaogaina o le tamaoaiga o le gataifale ma le siosiomaga o SALEILUA.

1.1 Autu o le Taiala

O le autu leni sa faatalatalanoaina ma malilie autasi i ai vaega uma o le afioaga o SALEILUA:

- la vaaia lelei ma pulea tatau le siosiomaga o le gataifale ;
- Toe faatupulaia punaoa ma tamaoaiga o le gataifale mo tupulaga i le lumanai.
- Puipuia ma faasaoina togatogo ma ona tamaoaiga

2 TULAFONO AUTU O FAIGAFAlVA

O le Tulafono Autu o Faigafaiva, 1988 ua avea ma taiala mo puipuiga, galuega ma isi vaega tau faigafaiva ma le sami e pei:-

- o le faasaoina, puleaina ma le atina'eina;
- faasaina o le faia o faigafaiva le talafeagai;
- faamalosia le laiseneina o vaa fagota mo fagotaga faapea le
- vaaia o taiala ma maliega aua le pulea tatau o faigafaiva i le va ma atunuu i fafo.

O nei tulafono uma e le o lava le silafia e le toatele o tagatanuu o Samoa aemaise le faamalosia e afioaga. Ona o nei faafitauli ua taumafai ai le Polokalame Faasao o le Gataifale mo Afioaga e unaia nisi o vaega o loo faatinoina nei e pei o aoaoga faapea le fesoasoani tele i le faamalamalamaina mo le silafia e le mamalu o le atunuu o ia tulaga.

2.1 Tulafono Faatonutonu o Faigafaiva (mo le Laiti o l'a ma Figota)

O le Tulafono Faatonutonu o Faigafaiva 1995, e faatapulaaina ai le laiti o l'a ma Figota e fagotaina ma faapea ona faatauina ai nisi o vaega e pei o:-

- āiāiga mo le puipuiga ma le faasaoina e aofia ai le faasaina ona fagotaina ma le faatauina o nisi o ituaiga o l'a ma figota;
- mea fagota e faasaina;
- pole mo fagotaga (faigafaiva i tuaau);
- fua faatapulaa o l'a ma figota e faatagaina ma isi.


2.2 Tulafono Laiti a Afioaga

O Tulafono Laiti a nuu ma afioaga ua amanaia tele e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona latou molia i le tulafono soo se tagata e le usitaia tulafono ua āiāia i totonu o le Tusi Taiala a lea afioaga. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupule ma autasi iai le pule mamalu a alii ma faipule o afioaga lava.

3 FAAMATALAGA E UIGA I LE AFIOAGA

O le afioaga o SALEILUA e i le itu i Saute o le motu o Upolu (silasila i le faafanua), ma o se tasi o afioaga o le Itumalo o Falealili. E matagofie ona laufanua ma lona atufalega faapea foi le talafatai o le gataifale.

Ata 1: Faafanua o Upolu o lo o faailoa mai ai le afoaga o SALEILUA



Vaega Faufautua (Ofisa Faigafaiva, 2009)

O le faitau aofai o tagata o le afoaga o SALEILUA e i le va o le 300 i le 400 (Ofisa o Tusigaigoa, 2001) e le o aofia ai i latou ua faimalaga atu ma aumau i Niusila, Ausetalia, Amerika ma isi atunuu i fafo.

E tasi le aoga i totonu o le afoaga na o le Aoga Tulaga Lua o loo aoaoina ai alo ma fanau o le afoaga. A'o le toatele lava o loo aoaoina i le Kolisi maualuga faaitumalo ma aoga eseese i totonu o le atunuu. E tolu ni fale tapua'i e iai le Ekalesia Mamona, Aso Fitu ma le Faapotopotoga Kerisiano i Samoa o loo tapua'i ai le afoaga. O nei tapuaiga o loo unaia ai le ola faa-kerisiano i totonu o SALEILUA, o se itu taua tele mo le nonofo fealofani o tupulaga aemaise le galulue faatasi o le afoaga i atina'e eseese.

O SALEILUA e mamalu ana pulega aua e puleaina lava e le Fono a Alii ma Faipule o le afoaga. O le aumaga e lava saunia i taimi uma aua le tautuaina o matai faapea tina latou te avatua fautuaga lelei mo ni mataupu tau lotoifale o le afoaga.

3.1 Gataifale o SALEILUA

O le afoaga o SALEILUA e tu matafaga ma e gatasi maualalo lona laufanua. O lenei afoaga e iai lona a'au pe a ma le 300 mita le umi. O le mamao o le a'au mai le matafaga pe tusa ma le 800 mita. O le vaega e aupito sili ona loloto o le aloalo pe a pe eleele le tai e tusa ma le 50 futu. E iai foi se vaega o le talafatai e ola ai le togatogo, ma i'a e pei o taiva, filoa, anae ma isi.

4 FAIGAFAlVA I LE AfIOAGA ma FAAfITAUl

I le faatinoga o faigafaiva i le afioaga, o alii e faatinoina fagotaga mauu i le aloalo aemaise tua'au, pe a ma le 15-20 faifaiva e fagogota pe ta'i faatolu pe faalima i le vaiaso pe a lelei le tau. I fagotaga i tuaau a alii, e tele ina faaaogaina ai paopao. I fagotaga a le itupa o tamaitai, pe a ma le 10 i latou e fagotaina figota ma isi taumafa o le sami.

4.1 Ituaiga Faigafaiva ma l'a Maua

O nisi nei o ituaiga faigafaiva eseese o lo o faatinoina mo le fofoga taumafa o aiga, faalavelave i totonu o le afioaga ia po o le faatau foi mo tupe maua. O ia fagotaga e iai le:-

- Mauu ma le matatao/mata;
- Afaloloa;
- Upega ma tili;
- Tuiga sea, loli, fugafuga mama'o ma ape faapea aoina o aliao, malili ma le matasali i luga o le a'au o lo o faatinoina e tina, tamaitai ma le fanau.

O le tele o i'a sa maua i aso ua mavae ua faigata ona maua i aso nei, ae a maua foi ua faaitiitia le faitau aofai faapea le lapopoa. O i'a ta'atele i le aloalo e iai:-

- Malau
- Poge
- Alogo
- Fuga
- Tifitifi ma isi.
- O le tele o i'a sa maua i aso ua mavae ua tau le iloa i nei aso, e iai foi ia ua matua le toe vaaia lava. E iai foi figota i le gataifale ua vaaia le faaitiitia o le faitau aofai aemaise o le tele o ni itula e faaaluina mo fagotaga pe'a faatusatusa i le tele o tausaga ua mavae.

O faafitauli ma suiga ua iai nei le gataifale o SALEILUA e pei ona ta'ua, o le leai lea o se amu aemaise o le faaitiitia o i'a ma figota ona o le soona fagotaina ma le faatinoina o faigafaiva le talafeagai e pei o fanai'a, ava niukini, tuiga ma isi. O le popolega o le afioaga ona o le tele o nei faafitauli i le gataifale o lo o faamoemoe i ai le fofoga taumafa e le gata mo le taimi nei ae i le lumanai. O lea ua a'e ai se tofa i alii ma faipule ina ia pulea tatau ma vaaia lelei punaoa ma alamanuia o le gataifale.

4.2 Aotelega o Tulafono Faale-nuu tau Faigafaiva i Aso ua Mavae

O SALEILUA, e i ai ana tulafono i aso ua mavae ma o lo o faaauauina pea ma mamalu i le pulega a alii ma faipule. O ia tulafono e matua faasaina lava faigafaiva le talafeagai e pei o:

- Fanaia;
- Ava niukini;
- Vailaau oona;
- Faamo'a/Tu'iga;

Ua faasaina foi tagata mai isi afioaga ona toe fagotaina gataifale o SALEILUA. E ui lava ina ua i ai tulafono e pei ona taua, ae le o atoatoa lona faatinoina ma lona va'aia ona o le lē aloaia e le 'au

faifaiva mai isi afioaga. O le isi itu o le mamao lea i tai o nofoaga o loo faatinoina ai isi ituaiga o faigafaiva atoa ai ma auala o loo faaaogaina.

O nei tulafono o loo āiāia malosi i tulafono Autu o Faigafaiva ma amanaia e le pulega mamalu a alii ma faipule o SALEILUA ma le faamoemoe ina ia toe faamalosia atili.

5 O LENEI FUAUFUAGA TATAU/TAIALA

E taua le fuafua lelei ma tulimata'i le sini autu o taumafai le mamalu o le afioaga e faataunuaina. O le faamoemoe maualuga o le Malo, ina ia faaleleia le soifua manuia o tagata o le afioaga ma ia faatupulaia atili mea taumafa mai le sami. O lea e manaomia ai le pulupululima o tagata uma o le afioaga i soo se faatinoga lelei e le gata e tua iai ae maua ai lo latou tamaoaiga. E pei ona ta'ua i le amataga, o le AUTU na talanoaina ma autasi uma iai finagalo o vaega taitasi o le afioaga i taimi o faatalatalanoaga:

- ✚ la pulea tatau ma vaaia lelei le siosiomaga o le gataifale;
- ✚ Toe faatupulaia punaoa ma tamaoaiga o le gataifale aua tupulaga i le lumanai.

5.1 Tapenaga

O lenei tapenaga sa saunia lava e le Fono a Alii ma Faipule ma tagatanuu o SALEILUA, faatasi ai ma le lagolagosua a le Ofisa o Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia pei ona faamatalaina atu i lalo.

5.1.1 Feiloaiga Muamua a le Afioaga ma le Ofisa o Faigafaiva

Sa faato'ai mai ai le finagalo o alii ma faipule i le Ofisa o Faigafaiva e faailoa mai ai lo latou fia auai i le Polokalame mo le pui puiga ma le faasaoina o gataifale i le aso 18 Aperila 1999. O le Aso 3 o Me 1999, sa faia ai loa se fonotaga muamua a le Ofisa ma le afioaga e faamalamalamaina ma taliaina ai le polokalame. O le maea o lenei feiloaiga muamua na taliaina lelei ai e le afioaga le polokalame ma faamautuina ai le aso mo faatalatalanoaga ma vaega e tolu o le afioaga.

5.1.2 Faatalatalanoaga ma Vaega o le Afioaga

O le faatinoga o faatalatalanoaga sa vaevaeina ai le afioaga i vaega e tolu o matai, aumaga ma tamaitai, ma sa faatautaia e le Ofisa o Faigafaiva mataupu taua i ia talanoaga. O nei faatalatalanoaga na mafai ai ona aoina mai ai manatu ma faamatalaga i faigafaiva, faafitauli o le gataifale aemaise ni fōfō e foia ai. E le gata i lea, o matafaioi a le afioaga i le faatinoina o galuega faapea matafaioi a le Ofisa o Faigafaiva e fesoasoani ai i le atinae Faasao o le Gataifale a le afioaga.

5.1.3 Komiti Faufautua o le Faasao

O le fonotaga a le Komiti Faufautua o le Faasao a le afioaga sa iloiloina ai le ata o lenei Tusi Taiala. O lenei Komiti Faufautua sa filifilia ai sui e ta'i tolu mai i vaega o matai, tina ma aumaga. O le matafaioi a le Komiti Faufautua o le tuufaatasia lea o faamaumauga ma faamatalaga sa aoina mai i faatalatalanoaga e pei ona ta'ua i luga.

5.1.4 Pasiaina o le Tusi Taiala i le Fono Mulimuli

O le fonotaga mulimuli i le 05 Iulai 1999 na talanoaina ai lenei Tusi Taiala sa tuuina aloaia i le fono a Matai e sui o le Komiti Fauautua ma le Ofisa o Faigafaiva mo le pasiaina.

O lenei foi fono na faailoa ai sui filifilia o le 'Komiti o le Faasao e taita'ia le faagaioiga o fuafuaga ua uma ona fa'ata'atitia. O le faagasologa atoa o nei fuafuaga fa'ataatitia e aofia ai vaega e faatautaia e le afoaga faapea fuafuaga e faatinoina e le Ofisa o Faigafaiva e lagolagosua ai i le Faasao o le Gataifale a le afoaga.

6 TOE ILOILOINA O LENEI TUSI TAIALA

E pei ona faailoa atu i luga o SALEILUA ua leva ona auai i le Polokalame lenei ma fausia, pasia ai le Taiala lenei ia Iulai 1999. Ua maea foi ona fausia tulafono e malu puipuia ai le soona fagotaina faasolitulafono o le gataifale. E iai nisi o faamanuiaga sa tuuina muamua i le afoaga e pei o atinae faisua, faailoagaina o le Fasao o le Gataifale, aoga i tomai eseese faa-faigafaiva faapea le pasiaina o tulafono laiti mo le afoaga.

O se vaitau o le 2001 sa le mafai ai e le afoaga ona toe faaauauina nei atina'e uma ma toe foi ai tagata e faatinoina faigafaiva le talafeagai. E afua nei faafitauli ona o nisi o feeseeseaiga i totonu lava o le afoaga ma ua faatuatanai ai e le pulega a alii ma faipule le faatauina o le gataifale faapea le polokalame Faasao a le Vaega o Faigafaiva.

O le masina o Ianuari 2009 na toe talosagaina ai e le afoaga le Ofisa mo le toe faatinoina o le Polokalame. Sa talia lelei le talosaga ma atofaina ai loa se fonotaga mo le toe iloiloina ma le faaleleia o fuafuaga ma tulafono o le Tusi Taiala lenei.

O le aso 14 Aperila 2009 sa tauaofia ai le fonotaga a le Komiti Fauautua filifilia a le afoaga ma le Vaega o Faigafaiva mo le toe iloiloina ma le auiliiliina o fuafuaga uma o lenei Taiala. Sa fai foi ni suiga talafeagai i tulafono, faasalaga faapea mataifaii faatino a le afoaga faapea le Vaega o Faigafaiva. O le sini autu ina ia mafai ona faaleleia tamaoaiga o le gataifale ma le siosiomaga ma ia maua pea le soifua manuia lautele o tagatanuu o SALEILUA mai faaoga tatau o punaoa o le sami. O loo faailoa atu i lalo tulafono taitasi sa soalaupuleina i lea fonotaga.

7 FUAFUAGA FAATAATITIA ma TULAFONO

O fuafuaga faataatitia o ni gaioiga ua faamoemoe e tatau ona foia ai faafitauli ua faaalua ma faailoa mai e vaega eseese o le afoaga. E lua vaega o fuafuaga faataatitia ua fuafuaina:-

- Fuafuaga faataatitia ua faaāgaāga e faatino e le afoaga;
- Fuafuaga faataatitia mo le Ofisa o Faigafaiva lea e patino lava i le tuuina atu o fautuaga mo le FAASAO a le afoaga.

O fuafuaga faataatitia a le afoaga e pito sili ona taua aua e faaalagolago i le pulega mamalu a alii ma faipule le maopoopoga o le faatinoga. Ae o galuega uma lava e faatinoina e le Ofisa o

Faigafaiva e ao ona faamaonia e le Ofisa Sili Lagolago (Assitant Chief Executive Officer) a le Matagaluega o Faatoaga ma Faigafaiva.

O nisi o tulafono o ta'ua i lalo a le afioaga e faamamafa ai Tulafono Autu a le Malo e puipuia, faaoga ma pulea tatau ai punaoa ma alamanuia o le gataifale.

7.1 Ia Faamalositia Tulafono Faale-nuu e Faasaina ai Faigafaiva le Talafeagai

Otootoga

O nisi o faigafaiva ua mautinoa e ogaoga o latou aafiaga i le faatamaia o le fogatai ma le tele o meaola o le gataifale. O se faataitiga o nei ituaiga faigafaiva le talafeagai e iai le faaogaina o vailaau o'ona, ava niukini, fanai'a faapea tu'iga poo faamo'a. Ua le gata ina faatamaia ai se vaega tele o le fogatai ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia i nei ituaiga o faigafaiva.

Fuafuaga Faataatitia a le Afioaga

Ua faailoa mai e le Komiti Faufautua a le afioaga le toe faamalositia o puipuia a le afioaga e faamamalu ai tulafono ua faataatitia. Ma sa faatalanoaina i le fonotaga a le Afioaga i le Aso 06 Aperila 2009 le toe faamalositia ma unaia e le Komiti o le toe faasalalauina o tulafono ina ia malu puipuia ai tulaga o le atinae aemaise o le ogasami faasao.

7.1.1 Tulafono

Mo tagatanuu SALEILUA faapea tagata mai isi afioaga:-

“Ua matua faasaina lava faigafaiva le talafeagai e pei o fanai'a, ava niukini, vailaau oona faapea tu'iga/faamo'a i gataifale o SALEILUA.”

7.1.2 Faasalaga

Mo soo se tagata o le afioaga e maua ua ia solia lea tulafono, o le a noatia i se sala tupe e \$500.00 Mo tagata mai isi afioaga, o le a molia sao i le *Tulafono Laiti a le Afioaga* poo le *Tulafono Autu o Faigafaiva, 1988*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia i lalo o lenei polokalame o Faasao o le Gataifale. E le gata i lea ae o le tuina atu o faamatalaga ma fautuaga mo le faamautuina o fuafuaga, atoa ai ma le faasalalauina o nei tulafono a le afioaga.

7.2 Ia Faasalalauina Tulafono a le Afioaga

Otootoga

Na fautuaina e le Komiti le faasalalauina o tulafono a le afioaga ua faataatitia mo le faamoemoe ia puipuia le siosiomaga o le gataifale ma ona tamaoia faapea faigafaiva. Sa talanoaina foi e le Komiti, e ao ona toe faasalalauina tulafono Autu o Faigafaiva faatasi ai ma isi tulafono pei ona pasia i lenei Taiala aua le silafia e tagata lautele e tusa o aiāiga uma o nei tulafono.

O le fonotaga i le aso 14 Aperila 2009, na faatalosagaina ai e le Komiti a le afoaga se fesoasoani a le Malo mo le faasalalauina o nei tulafono e ala atu i le Ofisa o Faigafaiva, ina ia mautu lelei ma faataunuina lea fuafuaga.

Fautuaga ma le Faamoemoe

Ina ia silafia ai e le atunuu aemaise ai o afoaga tuaoi nei tulafono, ma ia faapea foi ona nofouta i ai e tusa o faasalaga ua āiāia e alii ma faipule o SALEILUA.

Autu o le Faasalalaga: "*Puipuiga o le Gataifale o SALEILUA*".

Fautuaga a le Komiti

O le faasalalauina o tulafono o lenei Tusi Taiala o le a faatinoina lea e Alii ma Faipule o le afoaga.

Fuafuaga Faataatitia a le Ofisa o Faigafaiva





O le a fesoasoani le Ofisa o Faigafaiva i le tapenaina o Tulafono Laiti a le afoaga mo le pasiaina ma faasalalauina mo le silafia e le atunuu. O le a tufaina atu foi kopi o nei tulafono i afoaga tuaoi mo le silafia lautele.

7.3 Taofia le Faatafunaina o le Gataifale: Faasaina le Lafoai o Otaota ma Lاپisi i le Matafaga ma le Sami

Otootoga

O se tasi lenei o vaega o loo faamalositia i tulafono a le afoaga ona ona e tele lona aafiaga i le gataifale aemaise le au faifaiva.

O le lafoai o otaota i le sami ma le matafaga o le a:

-  avea ma mafuaaga ma nofoaga e tautuufua ai namu, mogamoa ma isi inseti faalafuā;
-  faamanu'alia pe lavevea ai tagata lautele i atigi apa ma atigi fagu, aemaise le avea ma puna'aga o faama'i;
-  avea ma nofoaga e le talafeagai mo meaola o le sami;
-  atagia ai le le faatauaina e le afo'aga o le gataifale ma le tele o ona alamanuia ma nisi o ona tamaoaiga.

Fuafuaga Faataatitia a le Afoaga

O le faamoemoe o le afoaga ia foia nei faafitauli ma toe silasila i se nofoaga e lafoai uma iai otaota a le afoaga atoa. Faataitaiga, e mafai ona lafoai otaota i se lua ma ufiufi malu aua le saogalemu mai faama'i ma siama feavea'i. Talu ai e mafai ona tafe ma ulu atu le oona o lapisi poo vaila'au o loo lafoaiina i lea lua, o lea e fautuaina ai le afoaga, ina ia eliina se lua i se nofoaga mamao ese mai puna vai taumafa faapea le sami mo le soifua maloloina o tagata.

O le fautuaga a le Komiti, o le faia ma faamauina lea o se tulafono e taofia ai tagata SALEILUA ma isi afoaga tua'oi ona toe lafoai ni otaota ma lapisi i le gataifale. O le faatinoina o lenei fuafuaga o le a i lalo pea o le vaavaaiga a le susuga i le tofi ma lana Komiti.

7.3.1 Tulafono

Mo taganuu o SALEILUA faapea tagata ese mai isi afioaga:-

“Ua matua faasaina lava ona toe lafoai otaota ma lapisi e pei o atigi apa, atigi fagu, uamea, pepa iila ma isi ituaiga i le matafaga ma le talafatai o SALEILUA.”

O le puipuiga ma le faamamaluina o lenei tulafono o le a i aao o alii ma faipule

7.3.2 Faasalaga

O soo se tasi e solia lenei tulafono o le a faasalaina i le \$100.00.

Mo tagata mai isi afioaga e solia lenei tulafono o le a molia sao i le *Tulafono Laiti a le Afioaga*.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva e toe faamautuina Tulafono Laiti, tuuina atu pepa o faamatalaga mo le silafia lautele o le afioaga.

7.4 Ia Aoina ma Faatama'ia Alamea

Otootoga

O le alamea o se meaola o le ituaiga o le aveau, ma e nofo pe maua i luga o a'au ma amu i le sami. O le alamea na te aina pe ola i meaola ninii ua ta'ua o polipe o loo fausiaina ai amu. A oo ina faateleina lenei meaola o le alamea, o le a faapena ona latou tapēina ma faatamaia a'au ma amu o lo o pipii ma ola ai. O le popolega o le afioaga, o le a i se tulaga pagatia le tele o meaola i le aloalo o loo faalagolago i le a'au ma amu mo meaai ma nofoaga e ola ai. E le mafai ona faaumatia pe tapēina lenei meaola i le sami. Aua foi, e mafai e le alamea ona toe ola pe tatupu ona itutino pe ola mai ai isi alamea fou seia vagana lava ua aumaia i le pa'umatū ma faamamagoina ai i le la, pe susunuina foi.

E pei ona faailoa mai e aumaga ma le au tautai, o le alamea o se tasi lea o faafitauli mo faigafaiva o loo iai nei i gataifale o SALEILUA.

Fautuaga Faataatitia a le afioaga

Ia aoina ma faaputuina e le afioaga alamea pe a latou va'aia pe tau foi iai i taimi o fagotaga. Ia aumaia i uta nei meaola ma tanumia pe faamagoina ai. Sa faaalua foi e le susuga i le tofi ua maea le latou fonotaga o le a faia lava galuega a le komiti mo vaiaso taitasi mo le aoina mai i uta o le alamea ma faatamaia ai.

Taimi Fautuaina

Ia faaaau le aoina o lenei meaola faalafuā i taimi uma ma aso uma. O lenei taumafaiga, o se auala e puipuia ai amu, siosiomaga ma le tamaoaiga o le gataifale.

Fuafuaga Faataatitia a le Ofisa o Faigafaiva

O le faamalamalamaina o ni fesili e faatatau i lenei fuafuaga i le aoina o le alamea, sa faapupulaina ai i le afioaga e leai se polokalame a le Malo e totogi ai le aoina ma le faatamaia o le alamea. Ae e fesoasoani pea le Ofisa o Faigafaiva e tuuina atu faamatalaga ma fautuaga mo auala e tineia ai le alamea mai gataifale o SALEILUA.

7.5 Ia Faasaina tu'iga ma faamo'a

Otootoga

O tu'iga ma famo'a ua maitauina e le afoaga le matua faaleagaina ai o le gataifale. O ituaiga faiva nei e faigofie ona maua ai i'a ma figota; peitai e ogaoga ma matautia ona aafiaga. O tu'iga ma faamo'a o se tasi lea o ituaiga faigafaiva o loo faatinoina pea e le afoaga ma ua matua faaleagaina ai amu aemaise i'a ma figota laiti. Afai ae faaauauina pea o lona uiga o le a tele se afaina o amu o loo fai ma ofaga ma nofoaga o i'a ma figota o le gataifale.

Fuafuaga Faataatitia a le Afoaga

Ua iai se finagalo i le Komiti a le afoaga e faamautuina pea lenei tulafono e faasaina ai tu'iga ma faamo'a aua ua mautinoa le faaleagaina ai o amu ma meaola ninii o le gataifale.

7.5.1 Tulafono

Mo tagatanuu o SALEILUA faapea faifaiva mai isi afoaga:-

"Ua matua faasaina lava ona toe faatinoina faigafaiva e pei o tu'iga ma faamo'a i gataifale o le nuu."

7.5.2 Faasalaga

Soo se tasi lava e faia lenei ituaiga faiva i gataifale o SALEILUA, o le a noatia i se sala tupe e \$500.00. Mo tagata mai isi afoaga o le a molia i le *Tulafono laiti a le afoaga* e tauala atu i le Vaega o Faigafaiva.

Fuafuaga a le Ofisa o Faigafaiva

O le a fesoasoani le Ofisa o Faigafaiva mo le faatinoina o Tulafono laiti a le afoaga ma tufaina atu fuafuaga faataatitia a le afoaga e ala atu i le Polokalame o Faasao faailoa pea le taua o le puipuia o le gataifale mai le faatinoina o nei ituaiga faigafaiva.

7.6 Ia Faasaina le Fagotaina o I'a ma Figota Laiti

Otootoga

O lenei fuafuaga tatau e taua mo i'a ma figota laiti ia latou maua ai se avanoa e fanafanau ai ae le'i fagotaina mai e le afaifaiva. Aua afai ae fagotaina mai i'a ma figota laiti ae le'i o'o i le lapopoa/matutua e fananau ai o lona uiga ua le mafai ona fanafanau mai ai nisi i'a ma figota o le sami ina ia faatupulaia ai ia punaoa. Afai o le a faaauauina pea lea tulaga, o le a saga faaitiitia ai le faitau aofai o i'a ma figota o le sami.

Fuafuaga faataatitia a le Afoaga

Ua faaalua le lagolagoina e le Komiti Faufautua a le afoaga o Tulafono Faatonutonu o Faigafaiva ua pasiaina o lo o āiāiā ai fua faatapula'a mo le laiti o i'a ma figota e tatau ona fagotaina mai.

7.6.1 Tulafono

Mo tagatanuu o SALEILUA faapea ai faifaiva mai isi afoaga:-

"Ua faasaina ona toe fagotaina i'a ma figota laiti mai le gataifale o SALEILUA, e pei ona faaalua i le Tulafono Faatonutonu o Faigafaiva a le Malo".

O le pui puiga ma le faamamaluina o lenei tulafono o le a i aao o alii ma faipule ma le afioaga o SALEILUA faapea le lagolagosua a le Vaega o Faigafaiva.

7.6.1 Faasalaga

Mo soo se tagata o SALEILUA e maua ua ia solia lea tulafono, o le a noatia i se sala tupe e \$100.00, ae mo tagata mai isi afioaga, o le a molia sao i *Tulafono Faatonutonu o Faigafaiva, 1995*.

Fuafuaga Faataatitia a le Ofisa o Faigafaiva

O auunaga a le Vaega o Faigafaiva i lalo o le Polokalame Faasao e aofia ai le tuuina atu o Pepa o Faamatalaga o loo iai i'a ma figota o loo aafia i lenei Tulafono. Ia faatinoina foi ni aoaoga mo le afioaga i aiaiga uma ma le sao o tagata nuu i le faamalosia o lenei tulafono.

7.7 Faasaina faigafaiva mai isi Afioaga

Otootoga

Ua maitauina e le afioaga o SALEILUA le faatupulaia pea o tagata fagogota mai isi afioaga ua fagotaina punaoa eseese o le aloalo. O le tele o nei faigafaiva ua faaogaina metotia le talafeagai ma soona fagotaina foi ma le le fuafua tatau nisi o tamaoaiga e pei o sea, ape, mama'o, loli faapea foi i'a eseese.

Fuafuaga Faataatitia a le afioaga

Ua faaalua mai e le komiti le faamalosia pea o lenei tulafono e pei ona faailoa atu i lalo faatasi ai ma lama moliuila i o latou gataifale. O le autu moni o lenei tulafono ona o nei faigafaiva mai isi afioaga o loo aumaia faigafaiva le talafeagai ma fatinoina i lo latou gataifale ma faaleagaina ai.

7.7.1 Tulafono

"Ua matua faasaina lava soo se tagata mai nisi afioaga ona faatinoina fagotaga le talafeagai faatasi ai ma lama moliuila ua faamauina i totonu o lenei Taiala".

7.7.2 Faasalaga

"O le a molia i le *Tulafono Laiti* a le afioaga soo se tagata e solia lenei tulafono".

Fuafuaga Faataatitia a le Ofisa o Faigafaiva

O le a matua lagolagoina e le Vaega o Faigafaiva lenei fuafuaga a le afioaga ma o le a faatinoina foi le Tulafono Laiti e pei ona fautuaina.

7.8 Ia faasaoina ma faateleina amu

Otootoga

O le pui puia ma le faasaoina o amu, o se tasi lea o auala ua mafai ona toe tutupu ma ola ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo

faalagolago mo meaai ma o latou nofoaga. O le faia o se ogasami faasaoina ma le taofia o faigafaiva le talafeagai o nisi ia o fuafuaga tatau ma le talafeagai mo le faateleina o amu.

Fuafuaga Faataatitia a le afioaga

Ua faalia e le komiti, o le faia o se ogasami faasaoina o se auala lea ua mautinoa ua mafai ona faasao ma faateleina ai amu. O lenei faasao o le a faatinoina e le Komiti faapea ai ma le Pule mamalu a Alii ma Faipule. O le vaaia lelei ma le mataituina o lenei faasao o le a feagai lea ma tagatanuu o le afioaga.

Fuafuaga Faataatitia a le Ofisa o Faigafaiva

O le a fesoasoani le Ofisa i le faalamalamaina o itu lelei o le faasaona o amu. O le a galulue faatasi le Ofisa o Faigafaiva ma le afioaga i el faatinoin o se suesuega i se vaega o le faatinoina ai le faasao.

8 ILOILOGA O LE TAIALA

Ua iai se maliliega i le Komiti Faufautua o le Gataifale o SALEILUA ma le VAEGA O FAIGAFAlVA o le a faaauau pea ona toe iloiloina le taulau manuia o lenei Taiala pe a mavae le ono (6) masina. O lenei iloiloiga o le a iloa ma mautinoa ai le alualu lelei poo ni faaletonu fo'i e feagai ma le faatinoina o galuega o lenei Taiala. O le a mafai foi ona faia ni fautuaga mo le lelei atili ma soalaupule foi ni faafitauli e ono tulai mai.

9 UPU MULIMULI

O le toe auai mai o le afioaga o SALEILUA i le POLOKALAME MO LE PULEA TATAU O TAMAOAIGA O LE GATAIFALE o se tofā ma se faautuga loloto, poo se faamoemoe ua matua sili ona talafeagai, ma ua mautinoa le manuia o le afio'aga i ni tausaga o i luma pe afai ae tumau ona faaauauina pea. O le manuia ma le alualu i luma o lenei polokalame e faalagolago tele i le galulue faatasi o le afioaga, i le pule mamalu a alii ma faipule, komiti a tina ma tamaitai, aumaga aemaise o le Malo e tau ala atu i le Ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faaatali ai lona taulau manuia ae peitai ua mautinoa o le toe faaleleia ai lea o alamanuia o le gataifale e faalagolago iai le afioaga. O i latou o le a talisapaia ma 'ae'ae i nei manuia, o tagatanuu lava o le afioaga faapea tupulaga i le lumanai. O lea ua a'e ai se tofa i le afio'aga e galulue faatasi i lenei polokalame a le Malo ma Afioaga e fesoasoani ai e toe tapu'e mai le tamaoaiga o le gataifale ua tauau ina mou atu.

10 SUI AUAI I LE FONOTAGA SA TOE ILOILOINA AI LENEI FUAFUAGA TATAU

O loo faailoa foi i lenei TAIALA suafa o'i latou sa faatinoina le Iloiloga o lenei Fuafuaga Tatau. O sui mamalu foi ia o le Afioaga ua filifilia e fai ma Komiti Faufautua o le Gataifale latou te faatinoina ma mataitūina le faatinoina o fuafuaga faataatitia ma galuega mo le faaleleia o le gataifaile ma ona punaoa eseese.

Matai

1. Umufaiesea Ueli
2. Umufaiesea Motu
3. Luatua Lemusu
4. Pa'u Faitala
6. Fanene Anitelea

Taulele'a

- | | | |
|---------------|------------------|---------------------|
| 1. Seemu luli | 6. Soofa Belford | 10. Metai Siaea |
| 2. Taiulu | 7. Peti Siaki | 11. Anepasa Siaifoi |
| 3. Lole Ioane | 8. Faisioka | 12. Siaopo |
| 4. Vasa Moana | 9. Ioane Iona | 13. Manua Sakopo |
| 5. Pea | | |

11 KOMITI O LE FAASAO A LE AFIOAGA

Vaega o Matai

1. Maumolipo Esekia
2. Paū Faitala
3. Umufaiesea Motu
4. Paū Tavita
5. Luatua Siliga

Vaega o Tina

1. Mata Iosua
2. Silia Toetu
3. Susana

Vaega o Aumaga

1. Seemū luli
2. Soafā
3. Metai